



Sofia Geisler
Inatsisartunut ilaasortaq, Inuit Ataqatigiit

§ 37 naapertorlugu apeqqutip nr. 239-p akineqarnera - atuarumannginnermut tunngasoq

30-07-2019
Suliap normua:
Allakkat nr. 10941081

Asasara Sofia Geisler,

Postboks 1029

3900 Nuuk

Oqarasuaat: : +299 34 50 00
Email: ikin@nanoq.gl
www.nanoq.gl

Inatsisartut suleriaasiat naapertorlugu apeqqutinnut qujanaq. Apeqqutigineqartut tullinnguuttuni akissuteqarfingissavakka.

Apeqqut 1: §37 naapertorlugu apeqqummut nr. 286/2018-imut, imm. 5, akissutiminni Naalakkersuisut allapput “*Meeqqat Atuarfiat pillugu Inatsisartut inatsisaanni nr. 15-imi 3. december 2012-imeersumi § 43, imm. 1, kingullermillu Inatsisartut inatsisaatigut nr. 21-kkut 13. november 2017-imeersukkut allanngortinneqartoq, naapertorlugu kommunalbestyrelsit illoqarfimmi atuarfiit akisussaaffigaat aammalu nakkutigissallugu, kommunimi meeqqat atuartussaatitaasut tamarmik Meeqqat Atuarfiannut allatsinnissaat imaluunniit Meeqqat Atuarfianni piumasaqaataasut naapertorlugit atuartinneqarnissaat akisussaaffigaat. Meeqqat Atuarfiata ingerlanneqarnera kommunalbestyrelsip anguniagassat killissallu tungaasigut aalajangersartarpaa. Kommunalbestyrelsip atuarfiup atuunnera ingerlaavartumik nakkutigisarpa, tassunga ilanngullugu Inatsisartut inatsisaat naapertorlugu aalajangersakkat eqquutsinneqarnersut. Tunngaviusumik atuarfiit kiffaanngissuseqartut aamma angerlarsimaffimmi atuartitsineq il.il. Kommunalbestyrelsip atuarfiit sulineranni anguniagassat killissallu aalajangersassavai. Kommunalbestyrelse atuarfiit sulinerannik nakkutilliisuuvoq, tassaasorlu atuarfiup Inatsisartut inatsisaanni matumani aalajangersakkanik eqqortitsinersut.*

Takuuk Inatsisartut inatsisaat nr. 10 15. april 2003-meersumi § 25, kingullermik Inatsisartut inatsisaatigut nr. 16-ikkut 20. november 2006-imi allanngortinneqartukkut kommunalbestyrelsi kommunimi meeqqap najugaqarfianiittooq tassaavoq, atuartitsinermik meeqqap angerlarsimaffiani pisumi il.il. nakkutiginnittusoq.”

- Naalakkersuisut ilisimatissutigisinnavaat Inatsisartut inatsisaata tunngaviusut Kommuninit malinneqarnerat atuutsinneqarnerallu Naalakkersuisut qanoq qulakteertarneraat?

Akissut: Aallaqqaasiullugu maluginiaqquneqarpoq, Meeqqat atuarfiat pillugu Inatsisartut inatsisaat nr. 15, § 37, imm. 1 naapertorlugu, Inatsisartut inatsisaannik nr.

21, 13. novembari 2017-imeersukkut allangortinneqartoq (meeqqat atuarfiat pillugu inatsit), Naalakkersuisut kommunit Inatsisartut inatsisaannik aqtsinerannik nakkutilliisussaapput. Tassunga tunngatillugu suliassaqarfimmi kommunit inatsimmik nakkutilliinerat eqqarsaatigalugu pingaarnertut oqaloqatigiinnermik tunngaveqartumik nakkutilliineq pineqarpoq tamannalu paasissutissanik pisariaqartinneqartunik pissarsinissamut periarfissat tunngavigilluinnarlugit pisarpoq. Oqaatigineqartut pissutsinut Namminersorlutik Oqartussat nalinginnaasumik ilitsersuiffigisinnaasaasa avataanni kommunit akisussaaffeqarfiinut pineqartunut assersunneqassapput. Aalajangersakkami imm. 2-mi aalajangersarneqarpoq, Naalakkersuisut paasissutissanik inatsit una naapertorlugu suliassamik isumaginissaannut pisariaqartutut isigisaminik kommunalbestyrelse piumaffigisinnaavaat.

Naalakkersuisut nakkutilliisussaatitaanerisa annertussusiat qanorlu ittusaanera aalajangersakkami imm. 2-mut nassuaatini allassimavoq. Tassani kommunalbestyrelsimit paasissutissanik pisariaqartinneqartutut isigineqartunik, Naalakkersuisut inatsit naapertorlugu suliassaattut pisariaqartinneqartutut isigineqartunik pissarsiarineqartussat allassimasut tassaapput Naalakkersuisut nakkutilliinermik suliassaat suliassallu allat inatsimmi aalajangersakkat naapertorlugin Naalakkersuisunit suliarineqartussat. Tassaasinnaapput paasissutissat atuarfinni tamani ukioqassutsit malillugit atuartut amerlassusaat, atuartut immikkut atuartinneqartut amerlassusaat, ilinniartitsisumut ataatsimut atuartut amerlassusaat, takuuk § 35, misilitsernerni misiliinernilu angusat, iliuusissatut pilersaarutit suliarineqarnerat, takuuk § 19 aamma communalbestyrelsit atuarfimmik nakkutiginninnerat pillugu paasissutissat. Paasissutissat meeqqanut ilinniartitsisut ilinniagaat pisinnaasaallu malillugit agguataarsimasunut aamma tunngassuteqarsinnaapput. Aalajangersagaq aamma oktoberip ulluisa aallaqqaataanni nalunaarusiotrermik tamakkuninngalu nassiussisarfittut taaneqartumik suliaqarnermi atorneqartarpooq, tassaniippullu paasissutissat arlallit atuartut amerlassusiannik kisitsinermiit ilinniartitsisut nal. ak. atuinerannut il.il. tunngasut.

Taamatuttaaq Tunngaviusumik atuarfiit namminersortitat angerlarsimaffimmilu atuartitaaneq il.il. pilligit Inatsisartut inatsisaat nr. 10, 15. april 2003-meersumi, kingullermik Inatsisartut inatsisaannik nr. 18, 3. decembari 2012-imeersukkut allangortinneqartumi taamatut Naalakkersuisut nakkutilliinissaannik aalajangersagaqanngitsoq oqaatigineqassaaq. Tassungali tunngatillugu meeqqat kikkulluunniit nunami maani sivikinnerpaamik qaammatini arfinilinni najugaqarsimagunik nunagisimagnikkuluunniit meeqqat arfinilinnik ukioqalernerminniit ukiup atuarfiusup aallartinnerani atuartinneqartussaatitaapput meeqqat atuarfianni atuartitsinernut peqataasinnaatitaallutik peqataasussaatitaallutilu imaluunniit meeqqat atuarfianni nalinginnaasumik piumasaqaatigineqartut assinganik atuartinneqartussaatitaapput, meeqqat atuarfiat pillugu inatsimmi § 29, § 30, imm. 1 aamm § 31, imm. 1 takukkit. Tassunga ilassutitut ilaatigut meeqqat atuarfiat pillugu inatsimmi § 43 naapertorlugu kommunimi meeqqat atuartussaatitaasut tamarmik assersuutigalugu meeqqat atuarfianni nalinginnaasumik piumasaqaatigineqartut assinganik atuartinneqarnersut nakkutigineqartussaasut allassimavoq.

Taamaattumik Naalakkersuisut nakkutillinerminni assersuutigalugu meeqqat angerlarsimaffimminkki atuartinneqartartut meeqqat atuarfianni nalinginnaasumik

piumasaqaataasut assinganik aamma atuartinneqarnersut communalbestyrelsip nakkutiginerai Naalakkersuisut nakkutilliinerminni aamma nakkutigisussaavaat.

Naalakkersuisut communalbestyrelsip inatsimmik malinnitsitsiniarneranik nakkutilliinerminni pissutsit ajornartorsiutit qitiusumik oqartussaasut namminneq malugisaat imaluunniit atuisut allat oqartussaasulluunniit allat ajornartorsiutit immikkut ittut uparuarsimasaat pillugit paassisutissanik pisariaqarttutut isigineqartunik piviusumik pissarsiariniartarpaat. Aammattaaq paassisutissanik kisitsisinillu katersineq tunngavigalugu nakkutilliisoqartarpoq, tassunga ilanggullugit oktobarip ulluisa aallaqqaataanni nalunaarutigineqartartut, alloriarnermi angusat aamma misilitsinerni angusat atorlugit. Oqaloqatigiinneq tunngavigalugu nakkutilliineq pissutsinut Naalakkersuisut communalbestyrelsip pisinnaatitaaffiinut inatsisitigut akuliunnissaannut pisinnaatitaanginnerannut sanilliunneqassaaq.

Apeqquut 2: §37 naapertorlugu apeqqummut nr. 286/2018-imut, imm. 6,
akissutiminni Naalakkersuisut allapput: "atuarfinni, illoqarfinni nunaqarfinnilu sorlerni meeqqat atuartussaatitaasutut ukiullit meeqqat atuarfianni atuannginnersut imaluunniit angerlarsimaffimminni atuartinneqartarnersut pillugit qitiusumik paassisutissaateqanngilagut. Taamatuttaaq atuartut qassit meeqqat atuarfianni atuartitsinermik malinnaannginnersut angerlarsimaffimminniluunniit atuartinneqartarnersut pillugit aamma paassisutissaateqartoqanngilaq."

- Naalakkersuisut ilisimatissutigisinnavaat akissutip taassuma tunniutereernerata kingorna iliuuseqarsimanerlutik meeqqat atuartussaatitaasut qassit meeqqat atuarfianni atuartitsinermut angerlarsimaffimminniluunniit atuartitsinermut tamatumunnga malinnaannginnersut?

Akissut: Ilinniartitaanermut aqtsisoqarfimmiut ukioq'manna maajip aallartinnerani atuartunik nalunaarsorneqarsimasunik tamakkulu inuit allattorsimaffiini najugaqarfiiunik misissuisinnaajumallutik Naatsorsueqqissaartarfimmut attaveqarsimapput. Naatsorsueqqissaartarfimmi ulapippallaarneq pissutigalugu aasaanerani sulinngiffeqareerunek suliassaq aatsaat suliarisinnaallugu e-mailikkut nalunaarput. Atortunik qitiusumit atuartunik malinnaanermut atorneqarsinnaasumik piorsaanissaq anguniagaavoq, tamatumani immaqa atuarfinni aqtsinermut pilersaarutinik Atuartitaanermut aqtsisoqarfimmit iserfigineqarsinnaasunut sanilliullugit tassuunakkut atuartut atuartinneqartussaatitaasutut ukiullit tamarmik atuarfimmi angerlarsimaffimminniluunniit atuartinneqarnersut qitiusumit malinnaaffigineqarsinnaalersillugit.

Tamatuma saniatigut Ilinniartitaanermut aqtsisoqarfimmiut kommunini atuarfinnut ingerlatsivinni aqtsisut akuttungitsumik oqaloqatigisarpaat, oqaloqatigiinnernilu ajornartorsiutit assigiinngitsut oqaluuserineqartarput, tassunga ilanggullugit inatsimmi piumasaqaataasut pillugit apeqqutaasinnaasut. Tassunga tunngatillugu augustimi ataatsimiinnissami tullermi ajornartorsiut Ilinniartitaanermut aqtsisoqarfimmi oqaluuserineqassasoq pilersaarutigineqarpoq, soorlutaaq sammisaq ukiau atuarfinni pisortat ukiumoortumik ataatsimiilerpata qaquinneqarumaartoq.

§ 37 naapertorlugu apeqqummut nr. 286/2018-imut tunngatillugu akissut matumuuna ersarissarneqassaaq, tassa atuartut qassit angerlarsimaffimminni atuartinneqarnersut kommuninit paasissutissiisutigineqartussaavoq kisianni atuartut atuartinneqartussaasutut ukiullit, nakkutilliinermi sularisat saniatigut, atuarfimmi angerlarsimaffimminniluunniit atuartinneqannginnersoq qassiunersut Namminersorlutik Oqartussani ilisimaneqanngillat.

Apeqquut 3: 3. Apeqquut 2-mut akissut naamiuppat: Tamatumunnga suna patsisaava?

Akissut: Matuma qulaani akissut takuuk.

Apeqquut 4: Naalakkersuisut ilisimatitsissutigisinnaavaat meeqqat atuartussaatitaasut meeqqat atuarfianni angerlarsimaffimmiluunniit atuartinneqanngitsut qassiunerannik paasissutissat qitiusumik ukiorpassuarni katersorneqarsimanninnerannut suna patsisaasimanersoq?

Akissut: Akissut meeqqat atuartinneqartussaatitaasutut ukiullit atuartinneqanngitsut pillugit nalunaarutigineqartartut akuttunerannut attuumassuteqartutut isigineqassaaq - tassa ukiumut marluk - sisamariaannarluni nalunaarutiginnittoqartartoq, taamaattumik ajornartorsut kommunini nammineq iluarsineqarsimasutut nalilerneqarpoq.

Apeqquut 5: Naalakkersuisut ilisimatitsissutigisinnaavaat meeqqat atuartussaatitaasut meeqqat atuarfianni angerlarsimaffimminniluunniit atuartitsinermut malinnaanngitsut qassiunerisa paasinissaannut qulakkeerinninnissamut imaluunniit meeqqat pineqartut allatigut atuartinneqarnissaasa qulakkeerneqarnissaannik Kommunit isumaginnissimannngitsut qanoq pillarneqarnissaannik periarfissaqarnerlutik?

Akissut: Tassunga tunngatillugu Naalakkersuisut nakkutilliinerminni pineqaatissiisinnaanissamut inatsisitigulluunniit sakkussaqartinneqanngitsut oqaatigineqassaaq. Taamaattorli pissutsit isornartuusinnaasut pillugit Naalakkersuisut eqqumaffiginneqqusisisinnaapput. Inatsimmik malinnitsitsiniarnermut tunngatillugu ajornartorsiutaasinnaasunik naammattuinerni nalinginnaasumik suliassaq pillugu kommunalbestyrelse nassuaaqquneqarsinnaavoq pissutsillu naapertorlugit inatsimmi tamanna pillugu piumasaqaatigineqartut naapertorlugit suliat aaqqissuuteqquneqarsinnaapput. Assersutigalugu meeraq meeqqat atuarfianni atualertussatut allatsissimannngippat tassanilu nalinginnaasumik piumasaqaatigineqartut assigalugit atuartinneqanngippat meeraq taanna allatut atuartinneqaqquullugu kommunalbestyrelse peqquneqarsinnaavoq. Tamatuma saniatigut suliassaqarfimmi ataatsimi arlalinniluunniit pitsangorsaasoqarnissaanik kissaateqarfiusut ajornartorsiutaasutulluunniit isigineqartut eqqumaffigeqqullugit Naalakkersuisut aalajangersinnaapput. § 37, imm. 1 pillugu nassuaatini innersuussineq kommunalbestyrelsip malinngippagu Naalakkersuisut apeqqut Kommuninik Nakkutilliisoqarfimmut saqqummiussinnaagaat allassimavoq.

Apeqquut 6: 6. Naalakkersuisut ilisimatitsissutigisinnaavaat tigusaqarsimanerlutik ilisimatinneqarsimanerlutilluunniit meeqqat atuarfimmi atuartitsinermut angerlarsimaffimmiluunniit atuartinnejarnissamut malinnaanngitsut pillugit imalinnik paasissutissanik?

Akissut: Aap, ilaanneeriarluni kommunini meeqqat atuartussaatitaasutut ukiullit inatsisillu malillugit atuartinnejannngitsut pillugit Naalakkersuisut paasissutissinneqartarput. Assersuutigalugu Naalakkersuisut aasaq manna kommuninut marlunnut saaffiginnissimapput, ilatigut nunaqarfimmi atuartut atuartussaatitaasutut ukiullit aaqqissuussaasumik akuttunngitsumillu atuartinnejannngitsut aamma nunaqarfimmi allami atuartitsisussaatitaanermik unioqqutitsisoqarsimanera pillugit.

Apeqquut 7: 7. Apeqquut 6-mut akissut aappiuppat: Taamak pisoqartillugu Naalakkersuisut qanoq iliorsimappat?

Akissut: Kommunimi inatsit malinneqanngitsoq paasineqarpat Ilanniartitaanermut aqutsisoqarfimmit nakkutilliineq pillugu nassuaasioqqullugu qinnuigineqarsinnaavoq. Allakkiami kommune pissutsit pillugit nassuaaqeqnassaaq aammalu siunissami pissutsit tamakkuusinnaasut qanoq iluarsineqassanersut oqaatigalugu. Apeqquutinut 1 aamma 5-imut akissutit takukkit.

Apeqquut 8: Naalakkersuisut ilisimatitsissutigisinnaavaat atuarumajunnaartoqartillugu suut patsisaasinnaanerannik misissuititsinissamut, taamaattoqarsimappallu taakku sumik imaqarpat?

Akissut: Naalakkersuisut maannakkut atuarumannginnernik misissuinissamik aallartitsisoqarnissaanik pilersaaruteqanngillat. Taamaattorli nunani tamalaani, aamma Danmarkimi, atuanngitsoortarnerit atuarumannginnerillu pillugit ajornartorsiuteqartoqalerluttuinnarput. 2019-imi upernaakkut MISI/PPR-imi naapeqatigiinnermi ajornartorsiut / pisartoq nunami maani suliassatut unammillernarsigaluttuinnartutut aamma eqqartorneqarpoq, nunanili allanisut pisumik ilisimasaqannginneq tamassuminngalu suliarinnissinnaaneq aamma nassuerutigineqartarunarpoq. Pisumik eqqartuinermi pisartoq tamanna annilaangariaatsinut pissusilersornernullu ajoqutaasunut assigiinngitsunut attuumassuteqartoq peqataasut oqaatigaat tamannalu atorneqalerluttuinnartoq peqataasut aamma isumaqarput. Tamanna Danmarkimi atuakkanik nassuaanerni aamma uppernarsarneqarsorineqarpoq, taamaattorli misissuineq nunani tuluttut oqaluffiusuneersuunerusoq aamma oqaatigineqarluni. **Atuakkanik nassuaateqarnerni tullinnguuttut makku oqaatigineqarput:** "Meeqqat inuuusuttullu atuarumanngitsut ataatsimoortuupput assigiinngitsunik ilisarnaatillit pissusilersuutillillu tamannalu pisumik ilisimasaqannginnermik suli paasiumpaannerulersinneqarpoq. Tamatumunnga tapiliussatut atuarumannginneq nappaammik suussususersinertut isigineqarsinnaanngilaq kisiannili ilisarnaatitut annilaangariaatsinut, misigissutsinut pissusilersornernulluunniit

akornutaasunut akuttunngitsumik attuumassuteqartartunut attumassuteqartutut (Egger, Costello & Angold, 2003, Løvereide, 2011)¹.

Taamaattumik nunami maani taamatut misissuinissamik pisariaqartitsisoqarnersoq tamakkuningga ilisimasalinnut paasiniaqqaarneqartariaqartoq Naalakkersuisut isumaqarput, tassunga ilanngullugit taamatut ilisimatusaataasinnaasumik aallartitsisoqannginnerani atuagarsorluni periutsillu imminnut illorsorsinnaasut atorlugit taamatut ullumikkut nalilersuisoqalinnginnerani.

Inussiarnersumik inuulluaqqusillunga

Ane Lone Bagger

¹ Atuanngitoortarnernik atuarumannginnernillu ajornartorsiutit. Pissutaasut katsorsaanerillu – Atuakkanik nassuaanerit. <https://metodecentret.dk>, 2017